

T5237.47/0304

雜書卷之十一

雜書卷之十一

雜書卷之十一

雜書卷之十一

雅音會編卷之十二

哈佛大學哈佛燕京圖書館珍藏印

羊城康麟文瑞集次
後學剡溪王純校正

下平聲

十二侵

五言絕句

正音

三閭廟

戴叔倫

沉湘流不盡屈子怨何深日暮秋風起蕭蕭楓樹林

視刀鏤歌

劉禹錫

常恨言語淺不知人意深今朝兩相視脉脉萬重心

送朱大入秦

孟浩然

游人五陵去寶劍直千金分手脫相贈平生一片心

江行無題

其四首

錢起

斗轉月未落舟行夜已深有村知不遠風便數聲砧

春江曲

郭振

江水春沉沉上有雙竹林竹葉壞水色即亦壞人心

遺響

宮中樂

長孫佐輔

月上宮花靜烟含花樹深銀臺門已閉仙漏夜沉沉

火爐前坐

李郡王

孤燈照不寐風雨滿西林多少閑心事書灰到夜深

正聲

江行

錢起

去指龍沙路徒懸象闕心夜涼無遠夢不為偶聞砧

春日歸家

李嘉祐

自覺勞鄉夢無人見客心空餘庭草色日日伴愁襟

題慈恩塔

荆叔

漢國山河在秦陵草樹深暮雲千里色無處不傷心

韓集

稻畦

卦布畦堪數枝分水莫尋魚肥知己秀鶴沒覺初深

五言律詩

始音

夏日游山家同夏少府

駱賓王

返照下層岑物外狎招尋蘭逕薰樨珮槐庭落暗金

谷靜風聲徹山空月色深一遺樊籠累唯餘松桂心

游梵宇三學寺

王勃

杏閣披青瑩瑤臺控紫岑葉齊山路狹花積野壇深
蘿幌栖禪影松門聽梵音遽忻陪妙躅延賞滌煩襟

郊園即事

烟霞春早賞松竹故年心斷山疑畫障縣溜瀉鳴琴
草徧南亭合花開北院深閑居饒酒賦隨興欲抽簪

正音

遊少林寺

沈佺期

長歌遊寶地徒倚對珠林
鴈塔風霜古龍池歲月深
紺園澄夕霽碧殿下秋陰
歸路烟霞晚山蟬處處吟

南州有贈

二首
其一

賈至

極浦三春草高樓萬里心
楚山晴靄碧湘水暮流深
忽與朝中舊同為澤畔吟
停杯試北望還欲淚霑襟

蘇氏別業

祖詠

別業幽居處到來生隱心
南山當戶牖澧水映園林
竹覆經冬雪庭昏未夕陰
寥寥人境外閑坐聽春禽
留別盧象

朝來已握手宿別更傷心
灞水行人渡商山驛路深
故情君且足謫宦我難任
直道皆如此誰能淚滿襟

臨江亭

儲光羲

古木嘯寒禽層城帶夕陰
梁園多綠樹楚岸盡楓林
山際豈為險江流長自深
平生何以恨天地本無心

武陵泛舟

孟浩然

武陵川路狹前棹入花林
莫測幽源路仙家信幾深
水迴青嶂合雲渡綠溪陰
坐聽閑猿嘯彌清塵外心

送僧自吳遊蜀

錢起

隨緣忽西去何日返東林世路無期別空門不住心
人烟一飯少山雪獨行深天外猿聲夜惟聞清梵音

與諸子登峴山

孟浩然

人事有代謝往來成古今江山留勝迹我輩復登臨
水落魚梁淺天寒夢澤深羊公碑尚在讀罷一沾襟

遺響

聞笛

張巡

岩嶷試一臨虜騎附城陰不辨風塵色安知天地心
門開邊月近戰苦陣雲深旦夕更樓上遙聞橫笛音

采蓮曲

二首
其一

戎昱

雖聽采蓮曲誰識採蓮心漾楫愛花遠回船愁浪深
烟生極浦色日落半江陰同侶憐波靜看粧墮玉簪

聽鄭五愔琴

孟浩然

阮籍推名飲清風坐竹林半酣下衫袖拂拭龍唇琴
一杯彈一曲不覺夕陽沉余意在山水聞之諧夙心

三體

七里灘

許渾

天晚日沉沉孤舟繫柳陰江村平見寺山郭遠聞砧

樹密猿聲響波澄鴈影深榮華暫時事誰識子陵心
孤山寺
張祐

樓臺從碧岑一徑入湖心不雨山長潤無雲水自陰
斷橋荒薛合空院落花深猶憶西窓夜鐘聲出北林

尋戴處士

皇甫冉

車馬長安道誰知大隱心蠻僧留古鏡蜀客寄新琴
曬藥竹齋暖擣茶松院深思君一相訪殘雪似山陰
早發中巖寺別契直上人

蒼蒼松桂陰殘月半西岑素壁寒燈暗紅爐夜火深

厨開山鼠散鐘盡嶺猿吟行役方如此途師懶話心

晚至華陰

皇甫曾

臘盡促歸心行人及華陰雲霞仙掌出松栢古祠深
野渡冰生岸寒川燒隔林溫泉看漸近宮樹晚沉沉

寄陸睦州

許崇

下國多高趣終年半是吟汝潮通越分部伍雜蠻音
曉郭雲藏市春山鳥護林東遊雖未遂日日至中心

寄靈一上人

劉長卿

高僧本姓竺開士舊名林一去春山裏千峯不可尋

新年芳草遍終日白雲深欲徇微官去懸知訝此心
題破山寺後禪院
常建

清晨入古寺初日照高林曲徑通幽處禪房花木深
山光悅鳥性潭影空人心萬籟此俱寂惟聞鐘磬音
酬普選二上人
嚴維

本意宿東林因聽子賤琴遙知大小朗已斷去來心
夜靜溪聲近庭寒月色深寧知塵外意定後更成吟
贈喬尊師
張鴻

長忌時人識有家雲澗深性惟耽嗜酒貧不破除琴
靜鼓三通齒頻湯一味參知師最知我相引坐檀陰
送章燠下第
綦毋潛

長安渭橋路行客別時心獻賦溫泉畢無媒魏闕深
黃鶯啼就馬白日暗歸林三十名未立君還惜寸陰
吳明徹故壘
劉長卿

古臺搖落後秋入望鄉心野寺來人少雲峯隔水深
夕陽依舊壘寒磬滿空林惆悵南朝事長江獨至今
道院
王周

白日人稀到簾垂道院深雨苔生古壁雪雀聚寒林

忘慮憑三樂消閑信五禽誰知是官府烟縷滿爐沉
送龍州樊使君

許棠

曾見邛人說龍州地未深碧溪飛白鳥紅旆映清林
土產惟宜藥王租只貢金政成閑宴日誰伴使君吟
懷永樂殷侍御

馬戴

石田虞芮接種柳白雲陰穴閉神蹤古河流禹鑿深
樵人應滿郭仙鳥幾巢林此會偏相憶曾供雪夜吟

送客歸湘楚

張祐

無辭一杯酒昔日與君深秋色換歸鬢曙光生別心

桂花山廟冷楓樹水樓陰此路千餘里應勞楚客吟

病中

錢起

私歸人暫適扶杖遠西林風思柳溪響露寒莎徑深
一身仍白髮萬慮只丹心此意無言處高窓托素琴

送友人尉蜀

徐鼎

故友漢中尉請為西蜀吟人家多種橘風土愛彈琴
水向昆明闊山通大夏深理閑無別事時寄一登臨
寄契盈上人

許渾

何處是西林疎鐘復遠砧鴈來秋水濶鴉盡夕陽沉

婚嫁垂前志功名異夙心
湯師不可問江上碧雲深
正聲

贈梁州張都督

崔顥

聞君為漢將虜騎不南侵
出塞清沙漠還家拜羽林
風霜臣節苦歲月主恩深
為語西河使知予報國心
送薛良友往越州謁從叔

崔峒

辭家日已久與子分仍深
易得思鄉淚難為送別心
孤雲隨浦口幾日到山陰
遙想蘭亭下清風滿竹林

類編

和謝舍人雪後寓直

皇甫冉

禁省夜沉沉春風雪滿林
滄州歸客夢青瑣侍臣心
揮翰宣鳴玉承恩在賜金
建章寒漏起更助掖垣深
寄敷水盧校書

黃滔

諫省垂清論仙曹豈久臨
雖專良史業未展直臣心
路入丹霄近家藏華岳深
還如韓吏部誰不望知音
送廬山人歸林慮山

皇甫冉

無論行遠近歸向舊烟林
寥落人家少青冥鳥道深
白雲長滿目芳草自知心
山色連東海相思何處尋

送元詵還江東

李端

渡江秋色裏詩興與歸心
寒路緣楓岸家人掃橘林
潮聲當晝起山翠近南深
幾日華陽洞寒花引獨尋

李沆園林

盧綸

古巷牛羊出重門接柳陰
閑看入竹路自有向山心
種藥齊幽樹畊田到遠林
願同詞賦客得與謝家深

遊精思觀主山房

孟浩然

誤入桃源裏初憐竹迳深
方知仙子宅未有世人尋
舞鶴過閑砌飛猿嘯密林
漸通玄妙理深得坐忘心

題義公禪房

孟浩然

義公習禪寂結宇傍空林
戶外一峰秀階前衆壑深
夕陽連雨足空翠落庭陰
看取蓮花淨方知不染心
送頭陀上人自廬山往東溪蘭若

鄭常

僧家無任着早晚出東林
行道非真相頭陀是苦心
持齋山果熟倚錫野雲深
溪寺誰相待香花與梵音

河嶽英靈

初出濟州別城中故人

王維

微官易得罪謫去濟川陰執政方持法明君無此心
閭閻河潤上井邑海雲深縱有歸來自多愁年鬢侵
題招隱寺絢公房
綦毋潛

開士度人久空山花霧深徒知燕坐處不見有為心
蘭若門對壑田家路隔林還言澄法性歸去比黃金
李集

杭州送裴大澤時赴廬州長史

西江天柱遠東越海門深去割辭親戀行憂報國心
好風吹落日流水引長吟五月披裘者應知不取金

送麴十少府

試發清秋興因為吳會吟碧雲歛海色流水折江心
我有延陵劍君無陸賈金艱難此為別惆悵一何深
謁老君廟

老君懷聖德靈廟肅神心草合人蹤斷塵濃鳥跡深
流沙丹竈滅閑路紫煙沉獨傷千載後空餘松栢林

杜集

長吟

江渚翻鷗戲官橋帶柳陰江飛競渡日草見踏青心

已撥形骸累真為爛熳深賦詩歌句穩不覺自長吟
初冬

垂老戎衣窄歸休寒色深漁舟上急水獵火著高林
日暮習池醉愁來梁甫吟干戈未偃息出處遂何心
劉九法曹鄭瑕丘石門宴集

秋水清無底蕭然靜客心掾曹乘逸興鞍馬去相尋
能吏逢聯壁華筵直一金晚來橫吹好泓下亦能吟

春望

國破山河在城春草木深感時花濺淚恨別鳥驚心

烽火連三月家書抵萬金白頭搔更短渾欲不勝簪

送賈閣老出汝州

西掖梧桐樹空留一院陰艱難歸故里去住損春心
宮殿青門隔雲山紫邏深人生五馬貴莫受二毛侵

奉贈王中允維

中允聲名久如今契濶深共傳收庾信不比得陳琳
一病緣明主三年獨此心窮愁應有作試誦白頭吟

瞋

日下四山陰山庭嵐氣侵牛羊歸徑險鳥雀聚林深

正枕當星劔收書動玉琴半扉開燭影欲掩見清砧
雲

龍以瞿唐會江依白帝深終年常起峽每夜必通林
收穫辭霜渚分明在夕岑高齋非一處秀氣豁煩襟
寄楊五桂州譚

五嶺皆炎熱宜人獨桂林梅花萬里外雪片一冬深
聞此寬相憶為邦復好音江邊送孫楚遠附白頭吟
銅餅

亂後碧井廢時清瑤殿深銅餅未失水百丈有哀音

側想美人意應悲寒甃沉蛟龍半缺落猶得折黃金

驪山

驪山絕望幸花萼罷登臨地下無朝燭人間有賜金
昂湖龍去遠銀海鴈飛深萬歲蓬萊日長懸舊羽林

憶鄭南坵

鄭南伏毒寺潇洒到江心石影銜珠閣泉聲帶玉琴
風杉曾曙倚雲嶠憶春臨萬里蒼茫水龍蛇只自深

示兩兒

此詩前有熟食日示宗文宗武此日又示兩兒

令節成吾老他時見汝心浮生看物變為恨與年深

長葛書難得江州涕不禁團圓思弟妹行坐白頭吟
課小豎鋤研舍北果林枝蔓荒穢淨訖移

床三首其一

病枕依茅棟荒鋤淨果林背堂資僻遠在野興清潔
山雉防求敵江猿應獨吟洩雲高不去隱几亦無心
憑孟倉曹將書覓土貴舊莊

平居喪亂後不到洛陽岑為歷雲山問無辭荆棘深
北風黃葉下南浦白頭吟十載江湖客茫茫遲暮心

南征

春岸桃花水雲帆楓樹林偷生長避地適遠更霑襟
老病南征日君恩比望心百年歌自苦未見有知音

夏日楊長寧宅送崔侍御常正字入京探
韻得深字

醉酒楊雄宅升堂子賤琴不堪垂老鬢還對欲分襟
天地西江遠星辰北斗深烏臺俯麟閣長夏白頭吟
渝州候嚴六侍御不到先下峽

聞道乘駟發沙邊待至今不知雲雨散虛費短長吟
山帶烏蠻潤江邊白帝深船經一柱觀留眼共登臨

春日江村

五首其一

農務村村急春流岸岸深
乾坤萬里眼時序百年心
茅屋還堪賦桃源自可尋
艱難昧生理飄泊到于今

長江

浩浩終不息乃知東極臨
衆流歸海意萬國奉君心
色借瀟湘濶聲驅灩澦深
未辭添霧雨接上遇衣襟

提封

提封漢天下萬國尚同心
借問懸車守何如儉德臨
時徵俊乂入莫慮犬羊侵
願戒兵猶火息加四海深

擣衣

亦知戍不返秋至拭清砧
已近苦寒月况經長別心
寧辭擣衣倦一寄塞垣深
用盡閨中力君聽空外音

野望

清秋望不極迢遞起曾陰
遠水兼天淨孤城隱霧深
葉稀風更落山迥日初沉
獨鶴歸何晚昏鷓已滿林

望牛頭寺

牛頭見鶴林梯迳統幽深
春色浮山外天河宿殿陰
傳燈無白日布地有黃金
休作狂歌老回看不住心

晴二首
其二

啼鳥爭引子鳴鶴不歸林下食遭泥去高飛恨久陰
雨聲衝塞盡日氣射江深迴看周南客馳驅魏闕心

哭李常侍嶧二首
其二

一代風流盡修文地下深斯人不重見將老失知音
短日行梅嶺寒山落桂林長安若箇伴猶想映貂金

白帝樓

漠漠虛無裏連連睥睨侵樓光去日遠峽影入江深
曠破思端綺春歸待一金去年梅柳意還欲攪邊心

病馬

乘爾亦已久天寒關塞深塵中老盡力歲晚病傷心
毛骨豈殊衆馴良猶至今物微意不淺感動一沉吟

峽口二首
其二

時清關失險世亂戟如林去矣英雄事荒哉割據心
蘆花留客晚楓樹坐猿深疲菊煩親故諸侯數賜金

韓集

枯樹

老樹無枝葉風霜不復侵腹穿人可過皮剝蟻還尋

寄託惟朝菌依投絕暮禽猶堪持政火未肯但空心
五言排律

正聲

題玉山村叟壁

錢起

谷口好泉石居人能陸沉牛羊下山小烟火隔雲深
一逕入溪色數家連竹陰藏虹辭晚雨驚隼落殘禽
涉趣皆流目將歸羨在林却思黃綺事辜負紫芝心
過山人所居因寄諸補遺

空谷春雲滿愚公晦跡深一隨玄豹隱幾換綠蘿陰

絕人稀到芳蓀我獨尋厨烟住峭壁酒氣出重林
胡蝶晴還舞黃鸝曉暫吟所思青瑣客瑤草寄幽心

寄彬州李相公

許渾

高樓王與謝逸韻比南金不遇銷憂日埃塵誰復尋
曠懷澹得喪失意縱登臨彩檻浮雲迥綺窓明月深
虬龍歷滄海鴛鸞息鄧林青雲傷國器白髮軫鄉心
功高恩自洽道直謗徒侵應笑靈均恨江畔獨行吟

贈蕭鍊師

曾試昭陽曲瑤齋帝自臨紅珠絡繹帽翠鈿束羅襟

雙闌朝塵起千門宿路陰出宮憂國步回駕軫皇心
桂殿春空晚椒房夜自深急宣求故劍冥契得遺簪
暗記神仙傳潛封女史箴壺中知日永掌上畏年侵
莫比班家扇寧同卓氏琴雲車辭鳳輦羽幘別鴛衾
網斷魚遊藻籠開鶴戲林洛烟浮碧漢嵩月上丹吟
露草爭三秀風篁共八音吹笙延鶴舞敲磬引龍吟
旄節纒腰舉霞杯皓腕斟還磨照寶鏡猶插辟寒金
東海人情變南山聖壽沉朱顏常似溼綠髮已如尋
養氣齊生死留形盡古今更求應不見鷄犬日駸駸

歲暮自廣江至新興往復中題峽山寺

密樹分蒼壁長溪抱碧岑海風聞鶴遠潭日見魚深
松蓋環青韻榕根架綠陰洞丁多斲石蠻女半淘金
南浦驚春至西樓送月沉江流不過嶺何處寄歸心

和李相國

巨寶珍吳果馴雛重越禽摘來魚浦上攜在兔園陰
霜合凝丹頰風披斂素襟刀分瓊液散籠蔽雪華深
虎帳齋中設龍樓洛下吟含消兼受彩應貴家卿心

送李太守赴上洛

王維

商山包楚鄧積翠靄沉沉驛路飛泉洒關門落照深
野花開古戍行客響空林板屋春勿南山城晝欲陰
丹泉通號畧白羽抵荆岑若見西山爽應知黃綺心

類編

春日奉獻聖壽無疆詞

十首其九

楊巨源

日上蒼龍闕香含紫禁林晴光五雲疊春色九天深
賞協元和德文垂雅頌音景雲隨御輦顯氣在宸襟
永保無疆壽長懷不戰心聖朝多慶澤璫樹粉墻陰

和許給事夜直

張九齡

未央鐘漏晚仙宇藹沉沉武衛千廬合嚴扃
樹搖金掌露庭接玉樓陰左掖知天近南軒見月臨
聲華大國寶夙夜近臣心逸興乘高閣雄飛在禁林

李集

送紀秀才遊越

海水不滿眼觀濤難稱心即知蓬萊石却是巨壑簷
送爾遊華頂令余發馬吟仙人居射的道士住山陰
禹穴尋溪入雲門隔嶺深綠蘿秋月夜相憶在鳴琴

杜集

送嚴侍郎到綿州同登杜使君江樓宴得
心字

野興每難盡江樓延賞心歸朝送使節落景惜登臨
稍稍煙集渚微微風動襟重舩依淺瀨輕鳥度層陰
檻峻背幽谷窓虛交茂林燈光散遠近月影靜高深
城擁朝來客天橫醉後叅窮途衰謝意苦調短長吟
此會共能幾諸孫賢至今不勞朱戶閉自待白河沉
贈裴南部聞袁判官自來欲有按問

塵滿菜蕪甌堂橫單父琴人皆知飲水公輩不偷金

梁獄書應作秦臺鏡欲臨獨醒時所嫉群小謗能深
即出黃沙在應湏白髮侵使君傳舊德已見直繩心

西閣二首其一

巫山小搖落碧色見松林百鳥各相命孤雲無自心
層軒俯江壁要路亦高深朱紱猶紗帽新詩近玉琴
功名不早立衰疾謝知音哀世非王粲終朝學越吟
風疾舟中伏枕書懷呈湖南親友三十六

韻

軒轅休製律虞舜罷彈琴尚錯雄鳴管猶傷半死心

聖賢名古邈，羈旅病年侵。舟泊常依震，湖平早見參。
如聞馬融笛，若倚仲宣襟。故國悲寒望，群雲慘歲陰。
水鄉霾白蜃，楓岸疊青岑。鬱鬱冬炎瘴，濛濛雨帶淫。
鼓迎方祭鬼，彈落似鴉禽。興盡纔無悶，愁來遽不禁。
生涯相汨沒，時物正蕭森。疑惑尊中弩，淹留冠上簪。
牽裾驚魏帝，投闕為劉歆。狂走終奚適，微才謝所欽。
吾安藜不糝，汝貴玉為琛。烏几重重縛，鶉衣寸寸針。
哀傷同庾信，述作異陳琳。十暑眠山葛，三霜楚戶砧。
叨陪錦帳坐，又訪白頭吟。反樸時難遇，忘機陸易沉。

應過數粒食，得近四知金。春草封歸恨，源花費獨尋。
轉蓬憂悄悄，行藥病泔泔。瘞天追潘岳，持危覓鄧林。
蹉跎翻學步，感激在知音。却假蘇張舌，高談周宋鐔。
納流迷浩汗，峻址得嶽岑。城府開清旭，松筠起碧浔。
披顏爭倩倩，逸足競駸駸。朗鑒存愚直，皇天實照臨。
公孫仍恃險，侯景未生擒。書信中原闊，干戈北斗深。
畏人千里井，問俗九州箴。戰血流依舊，軍聲動至今。
葛洪尸定解，許靖力難任。家事丹砂訣，無成涕作霖。

七言絕句

正音

嫦娥

李義山

雲母屏風燭影深
長河漸落曉星沉
嫦娥應悔偷靈藥
碧海青天夜夜心

題張主人壁

張謂

世人結交須黃金
黃金不多交不深
縱令然諾暫相許
終是悠悠行路心

遺響

東隣美文歌

宋濟



